

欽  
定  
全  
唐  
文

欽定全唐文卷一百十七目錄

晉高祖

四

示百寮御札

示百寮御札

令百官上封事御札

幸洛都御札

封錢元瓘吳越國王玉冊文

改元大赦文

御文明殿大赦文

幸汴州赦文

幸鄴都赦文

平范延光大赦文

遺後蜀後主告即位書

答淮東鎮書

欽定全唐文卷一百十七

晉高祖 四

示百寮御札

朕猥以眇冲式承眷命雖宵衣旰食不敢怠荒而一日萬  
幾有虞曠闕應在朝文武臣寮等早升班序並蘊器能懷  
康濟之才展經綸之術旣逢昌運宜罄讜言須務救時各  
思舉職勿取容而避事勿尸祿以曠官或時經未叶於和  
平必思獻替或命令未諧於允當必在箴規苟有敷陳並  
當開納俟汝匪躬之節副予仄席之求凡在朝廷共裨寡

德咨爾卿士宜體朕懷

示百寮御札

朕自祗膺大寶虔奉丕圖每念創業之艱難未嘗終食而懈惰所冀照臨之內將臻康泰之風庶幾億兆之中漸息瘡痍之痛雖疚心罔暇而逆耳無聞豈視聽之不開致箴規之未貢應在朝文武臣寮等各懷異術早踐通班宜陳經濟之謀用贊興隆之道勿失讜直之議無拘循避之規咸罄乃誠同規不逮宜令在朝文武臣寮每人各進封事一件仍須實封通進務裨闕政用副虛懷凡百寮寮宜體

朕意

令百官上封事御札

百官曾有宣示令進封事據到者未及十人朕雖無德自行勅後數月至惜人也應有一件事食祿於朝卒無一言可不知貞觀政要說言而不用朕所甘心用而不言誰之責也

幸洛都御札

朕自承天命肇啟帝圖期四海之混同法五載之巡狩瞻惟全魏實曰奧區人物殷繁山河雄壯地雖昇於都邑民

未識於乘輿皆傾望幸之情宜展省方之義取今月五日  
暫幸洛都沿路供頓並委所司以官物排比州縣官不得  
科率人戶其隨駕內外官員并馬步兵士等不得擾人踐  
踏苗稼中外遐邇宜體朕心

封錢元瓘吳越國王玉冊文

唯天福三年歲次戊戌十一月甲辰朔五日戊申皇帝若  
曰王者握圖立極崇德報功或開國以建邦或苴茅而錫  
壤乃樹藩屏式獎忠勲古先哲王率由斯道惟朕薄德敢  
忽彝章況夫奠南服之奧區鎮東甌之重地懋績雖高於

列土殊榮未繼於肯堂得不申加等之恩降非常之命用  
紀代天之業特頒鏤玉之文乃擇吉辰爰敷盛典咨爾興  
邦保運崇德志道功臣天下兵馬副元帥鎮海鎮東等軍  
節度浙江東西等道管內觀察處置兼兩浙鹽鐵制置發  
運營田等使開府儀同三司檢校太師守中書令杭州越  
州大都督府長史上柱國吳越王食邑一萬五千戶實封  
一千五百戶錢元瓘嶽靈稟粹天象儲精蘊文武之兼材  
受乾坤之間氣寵承吳越功邁桓文運妙畧以平凶用奇  
兵而制變祇嗣基構表率英雄淮彝之屏氣銷聲海嶠之



波澄浪息而況興我昌運竭乃忠規懋勲庸而首列韓壇  
奉玉帛而誠先禹貢語尊獎則獨標大節顧封崇則未稱  
鴻名宜舉徽章俾奉先正矧其天文當南斗之分地志控  
勾踐之都眷茲舊封允屬全德是用異車服於羣后盛簡  
冊於列藩正二國之土疆錫九天之寶瑞表予嘉命績乃  
舊邦大振家聲夾輔王室今遣使大中大夫尚書左丞上  
柱國賜紫金魚袋王延使副中散大夫尚書司門郎中柱  
國賜紫金魚袋張守素持節備禮冊爾爲吳越國王於戲  
服袞衣而佩元玉位壓羣侯駕戎輅而握兵符名尊九伐

馭貴之重象賢之榮爾其祇荷天光勉清國步往綏厥位  
永孚於休戒之慎之勿忝前烈

改元大赦文

古者君臨大寶子育黎民爰當御歷之初宣布惟新之令  
將冀昭蘇品物蕩滌瑕疵大推作解之恩俾樂咸亨之運  
恭以明宗皇帝經綸草昧統御寰瀛垂衣而八表歸心負  
展而十年無事必謂盤維永固鼎社無遷立萬代之基圖  
爲百王之軌範洎遺弓劒遂起干戈逆豎延災宗英失守  
劫奪神器侮亂天常誅戮至親虐害無告顧予何咎忽有

異謀無名而大舉甲兵不道而廣勞生聚寰中板蕩天下  
驚騷內外離心遐邇積怨嗷嗷士庶若無所依契丹皇帝  
不忘先朝特存舊好親提銳旅遠殄羣凶未整鵲鵲盡殲  
蛇豕而復念中原之無主憫四海之倒懸欲泰羣情特申  
大義猥惟涼德俾纂寶圖成命不迴固讓莫得殷湯以東  
征西怨乃踐帝圖夏禹以地平天成遂興王業矧予寡昧  
有愧推崇雖勉副羣心恭臨大位將何以祇膺眷祐統和  
人神以是馭朽興懷宵衣在念躋生民於富壽保社稷於  
延洪頒歷紀年既有遵於典冊推恩行慶將普及於幽遐

宜改長興七年爲天福元年大赦天下十一月九日昧爽  
已前應在京及諸州郡邑罪犯及曾受僞命職掌官吏并  
見禁囚徒已結正未結正已發覺未發覺罪無輕重常赦  
所不原者咸赦除之應曾相連賊黨軍人百姓有奔竄山  
谷者一切不問任歸本貫如卻願在軍者亦仰所司申送  
當令本軍收管易俗移風宜遵善教尊本敬始自有常規  
明宗朝所行勅命法制仰所在遵行不得改易悉力爲時  
罄財助國苟不推於恩信亦何示於賞酬自舉義已來應  
借率人戶及經抄括商旅資財錢物委所司明置文籍候

平定之後當議給還京城將士降附軍戎自舉義已來悉聞忠盡宜加賞賚以勸勤勞應在京諸軍將領兵士等候並破賊寨當議各加優賞有沒於王事者各與贈官其子孫並與量才敘用文武官寮等久輸推戴之誠宜示獎勵之道應在京文武官寮及軍府將校并勸進官等兼前資官內自五月後來未曾分掌職任並各與遷轉官資自五月後來已曾受官者不在此限其軍府諸色職掌將吏等已及押衙職者并與加官未及押衙職者各與遞遷職次應超魏府行營及係侍衛諸軍將校等并已加恩外所有

六軍及諸道本城并替換在諸處將校未加恩者凡執干戈皆爲社稷雖守役或分等次而傾心盡著勤勞且被渥恩各升官秩用獎輸忠之效俾堅禦侮之誠其六軍及諸道州府本城并替換在諸處將校未加恩者宜令并與依資轉官仍令六統軍及諸道州府據前項軍都自副將已上分析名銜申奏鹽麥之利軍府所須倘不便於戶人宜別從於條制所期濟衆無患妨公在京鹽貨元是官場出糴自今後並不禁斷一任人戶取便糴易仍下太原府更不得開場糴貨其麴每斤與減價錢三十文恩推掩骼義

顯燭幽允諧遐邇之心冀叶陰陽之序應自舉義已來或有因事抵法之人及九月十四日後殺戮賊寇所在暴露骸骨未有骨肉收認無主者委逐處長吏埋瘞弓旌聘士巖穴徵賢式光振鷺之班將起維駒之詠應山林草澤賢良方正隱逸之士委逐處長吏切加採訪咸以名聞當議量才敘任昨以寇戎久在郊境頗傷禾稼賦租應近畿五十里內委逐處令長檢覆當與免今秋稅租差科於戲甘澤配天萬物以之膏潤震雷出地百卉繇是發生將欲道和氣於八方示深仁於三面永康聖歷普洽民心凡百庶

寮洎方伯連帥克奉明恩勉揚厥職共臻至化稱朕意焉  
赦書日行五百里敢以赦前事言者以罪罪之布告中外  
咸使聞知

御文明殿大赦文

蓋聞神無常祀惟德是歆民無常懷非賢不乂歷數有歸  
者人祇共贊文明懷遠者龜筮叶從所以周開七百之基  
夏作三王之首伏自莊宗失馭天下分離萬國懷賢三靈  
改卜明宗皇帝潛符景運克紹寶圖一莅寰區八周星律  
僞主從珂始因微績序在維城遇大國之多艱以列藩而



入統勦絕裔嗣屠害忠良臨大寶而罔以德聞御諸侯而  
惟將威脅朕以明宗皇帝每宏厚遇益勵微誠無纖粟而  
使人可疑無絲毫而事君不謹豈期深苞禍釁暗抱猜嫌  
欲用奸謀擬相魚肉初以北門之事委朕一生忽將汶上  
之田遷予十乘二三其德始終違心既欲害於無辜孰肯  
扶其不道而遇北朝皇帝英明鑒古威武冠今嫉彼不平  
閔予多難遂致累殲凶寇繼納降兵每借巨功俾成大業  
朕自興基構頗厯艱難冀兆億而保安敢興寐而輒怠今  
則重光日月再造乾坤宜覃在宥之恩以布鼎新之命可

大赦天下今月二十九日昧爽已前應在京及諸州府凡有所禁囚徒已發覺未發覺已結正未結正罪無輕重常赦所不原者咸赦除之雷雨作解瑾瑜匿瑕宜加盪滌之恩用示包容之應中外諸色職掌官吏有受僞命者一切不問旣除巨蠹亦愍俱焚難全者須正呂刑可恕者特開湯網僞庭賊臣張延朗劉延皓劉延朗等並姦邪害物貪猥弄權罪已滿盈理難容貸除此三人已行勅命外其有宰臣馬裔孫樞密使房暉宣徽使李專美河中節度韓昭裔等四人雖元事僞庭咸居重位每持忠懇不務詭隨僞

主不任才謀遂致傾覆朕昔在藩邸備所諳知今並釋放一切不問應中外官寮之外有自舉義已來歸順者委中書門下別加任使應僞庭貶降官未量移者與量移已量移者與復爵受官亦與復資應徒流收管人並放還伏以少帝地居嫡裔位纂洪圖王從珂始構異謀非理屠害一家骨肉將正承祧之典式敦敬始之名宜令中書門下追尊定諡擇日禮葬妃孔氏宜行追冊祔葬應有宿舊臣寮並與量加敘用昨者舉義之地稱師之邦必蹂踐於川原要矜蠲於輿賦其河東管內諸縣稅租今年秋及來年夏

稅各與減放一半警蹕經過之地望幸雖榮蕃漢雜處之  
兵禁暴難備旣頒渥澤須示優矜昨大軍兵士自河東以  
至京畿沿路擾踐之處宜委逐處長吏公當檢覆據頃畝  
特與蠲放今年秋稅一半朕昨於霸府創置新軍救時昔  
在於從權卹下今徇於所欲河東所有新招置義勝軍人  
並放逐便賞罰二柄激勸萬方倘稽甄獎之恩何答勤劬  
之效應扈駕及相次歸順軍都並與重加優賞但緣宮內  
庫藏虛乏宜令三司疾速抽徵諸道稅物以充賞給其指  
揮使等並與超轉官資五月後來已曾受恩命者亦與依

資轉官高懸朗日照臨必備於遐陬大扇仁風亭育罔遺於纖芥應天下歸順節度使刺史下賓席郡職及將校等委中書門下各與改轉官資覆車難襲弊政宜遷恤鄉邑之瘡痍救民人之疾苦其北京管內鹽當戶合納逐年鹽利昨者僞命指揮使每斗須令人戶折納白米一斗五升極知百姓艱苦自後宜令人戶以元納食鹽石斗數目每斗依時價計定錢數所取人戶便穩折納一人湯沐之奉實在王畿兆民凋弊之風宜行仁恕其洛京管內逐年所配人戶食鹽起從來年每斤特量減價錢十文應諸道州

府所徵百姓正稅斛斗錢帛等除係省司文帳外所在州府並不得衷私增添紐配稅物應有懷才抱器隱遁山林方切務於旁求宜遍行於搜訪委所在長吏備達朝旨具以名聞致仕官或筋力未衰才能可任將表乞言之敬難從歸老之心委中書門下商量奏聞當議昇擢義夫節婦孝子順孫委逐道奏聞當加旌表應自起義已來或盡節捐軀歿於王事宜加褒贈兼恤妻孥俾義激於忠貞庶恩霑於幽顯鳴諫鼓以俟謹言列柱石以申冤滯將聞善以自戒思與物以垂恩備著前規用光大業或直辭可貢或

有理可矜各務奏陳皆當鑒納明宗朝屬之內宿舊之中  
或功名曾著於輿情或材氣可裨於公政宜委中書門下  
量才敘錄關防凡有征稅省司曾降條流慮多時而或有  
隱藏因肆赦而再頒條貫應諸道商稅仰逐處將省司各  
收稅條件文牒於本院前分明張懸不得收卷牒內該名  
目分數者即得收稅如牒內元不該說著係稅物色即不  
得收稅宜令所在長吏常加覺察如敢有違條流不將文  
牒張懸將不合係稅物色收稅欺罔官法停滯商賈盡時  
具名申送奇伎淫巧往誥不容務實去華哲王所尚應有

浮虛假僞之物不鬻於市肆委所在常加覺察犯者加重  
刑責士流之內有懷才抱器碩學殊能者委中書門下搜  
訪任使勿拘門地資歷於戲愛民如子王者之所以勅興  
損已從人眇躬而安敢自忽況朕驟主百靈之祀創開萬  
乘之基朽索在懷求衣益勵更賴庭中多士闡外諸侯咸  
罄良籌共裨不逮初寧鯨浪適啟龍圖冬陽開溫照之光  
春雨灑涵濡之澤惟新正令不宰元功中外臣寮體予深  
意

幸汴州赦文



歷代省方蓋觀風而設教前王展義皆利國以便民雖今古以有殊在皇王而無異朕艱難創業宵旰臨朝每軫念於瘡痍敢自辭於癰瘡近以浚郊奧壤梁苑名區乃舟車通會之都實人物殷繁之地春秋租稅可贍給於兵師遠近蒸民免煩勞於饋運爰從清洛遂整鳴鑾六飛旣議於按巡四海漸期於開泰今則已臨汴水宜順薰風思覃渙汗之恩特布如綸之命普安區宇首念狴牢況當長養之時曲示矜寬之澤應天福二年四月五日昧爽已前諸道州府見禁囚徒大辟已下罪無輕重並從釋放凡關布澤

務在及民宜加軫憫之恩俾遂蘇舒之望天福元年已前  
諸道州府應係殘欠租稅並特除放諸道係徵諸色人欠  
負省司錢宜令自僞主清泰元年終已前所欠者據所通  
納到物業外並與除放或水旱爲災蟲螟作沴儻無軫恤  
何致阜豐朕昨行至鄭州滎陽縣界路旁見有蟲食及早  
損桑麥委所司差人簡覆量與蠲免租稅河陽管內酒戶  
百姓應欠天福元年閏十一月二十五日已前不數年額  
麴錢並放其諸處應經兵火者亦與指揮當罪即誅式明  
常典旣往可憫宜示深仁僞主清泰中臣寮內有從誅戮

者並許收葬要荒之內鄉黨之中宜宏養老之規式表問  
年之道天下百姓有年高八十已上者與免一子差徭仍  
令逐處簡置上佐官過滎陽而因思紀信屈夷門而尚想  
侯嬴著高義者猶足歎嘉蹈忠節者固宜旌賞事資激勸  
恩在褒揚梁故滑州節度王彥章效命當時致身所事凜  
千年之生氣流百代之令名宜令超贈太師子孫量才敘  
錄亡命藏姦此自機槍之際好生惡殺宜宏曠蕩之恩應  
諸道州府管界內有自僞命抽點鄉兵之時多是結集劫  
盜因此畏懼刑章藏隱山谷宜令逐處曉諭招攜各令復

業自今年四月五日已前爲非一切不問如兩月後不來  
歸業者即令所在長吏嚴加捕逐復罪如初於戲撫俗安  
民御宇式明於敏政行慶施惠爲君用顯於推誠況潛躍  
之時開創之始外則五侯九伯協力裨助內則四輔三公  
同心翼戴已寧華夏實賴忠良旣光帶礪之勲無忘盤盂  
之誡凡百有位更竭乃誠共致隆平永輔寡昧布告遐邇  
宜體朕懷

幸鄴都赦文

自昔聖皇明帝膺圖受命必觀風而設教或展義以省方

上則順彼天道下則從其人欲朕創開基業每遵舊章期四海之混同法五載之巡狩乃睠全魏肇啟新都頃屬經綸嘗茲潛躍宜從望幸俾慰來蘇遂整明鑾旋臨舊地雷雨作解式覃曠蕩之恩日月無私用廣照臨之道應三京新都諸道州府天福六年八月十五日昧爽已前諸色罪犯已結正未結正已發覺未發覺罪無輕重常赦所不原者咸赦除之其持仗行劫并殺人賊免罪移鄉仍配逐處軍都收管其犯枉法贓人雖免罪即不得再有任用或始因罪犯久處竄流特行洗滌之恩各遂歸還之望應配流

人并已前逢赦不在放還人等并放還徒罪年限未滿者並放偶負瑕疵爰從黜降俾量移於近地宜漸復於舊資應貶降官等未量移者與量移已量移者約資敘進用或歲因災沴民用艱辛久係逋懸宜示蠲免應欠天福五年終已前夏秋稅租并沿徵諸色及營田租課並與除放朕頃當開創爰在并汾或傾歸順之心首謀翊戴或擁驍雄之旅力效推崇洎汜水興妖鄴城待罪每令致討皆立奇功漸臻開泰之期愈念艱危之際宜頒殊渥允答茂勲應河東起義之初佐命效順收復鄴都汜水立功臣寮將校

等並與加恩其亡歿者更與追贈子孫已有官職者與遷改未有身名者與敘用經過郡縣迎奉乘輿旣供億以爲勞宜旌酬而示寵自東京至鄴都沿路供頓官員職掌等並與加恩六飛行幸萬騎扈從慮旁午於路歧微損傷於苗稼應沿路有傍道稍損卻田苗處其合納苗子及沿徵錢物等據畝數並與除放載念雀臺昔居侯服撫綏六郡臨蒞四年睠彼職員依然父老無恡推恩之典仍敦尚齒之風鄴都并相澶貝博衛等州官員職掌內有頃歲潛龍時在職者並與加恩管內耆老八十已上者並與版授上

佐官爲國之規利物爲本農器俾從於改革畊民必致於便宜諸道鐵冶三司先條疏百姓農具破者須於官場中賣鑄時卻於官場中買鐵今後并許百姓取便鑄造買賣所在場院不得輒有禁止攪擾擢文武之才今之急務旌孝義之行古有明文贊治道以克隆致人倫之式序山林草澤內有文才武藝爲衆所推者委長吏切加搜訪具以名聞當議量才敘用孝子順孫義夫節婦並與旌表門閭天覆地載無所不容改過自新於斯爲美應亡命山澤負罪潛藏者並放罪招攜各令歸業所在切加安撫如過百



日不出者復罪如初唐室忠臣鄴臺靈廟濟蒼生於一境  
正皇統於中區宜命褒崇用彰激勸唐梁國公狄仁傑與  
追贈官秩主掌曠敗錢物逋懸宜示矜容聊加蠲免應天  
福三年終已前諸色場院官欠負官中錢物人等累經徵  
理通勘實無錢物家業者並與除放其人免罪任從逐便  
不得再任使無黨無偏徇至公之道去泰去甚戒求利之  
心私下債負徵利已及一倍者並與除放如是主持者不  
在此限邊陲管界蕃部經繇言念疲羸良深軫恤忤代蔚  
并鎮州管界內有經蕃部踐踏卻苗稼者其合納苗子治

徵錢物等據頃畝與除放其經燒藝舍室殺傷人命者據戶下合徵苗稅並與除放於戲居域中之大爲天下之君按巡旣展於盛儀渙汗宜覃於慶澤人情允洽帝道有光更期忠藎之臣永贊隆平之運布告遐邇知朕意焉

平范延光大赦文

天有四時首布和陽之命君臨萬國先宏曠蕩之恩所以垂眚肆之文則周基遠大示寬仁之詔則漢業興隆朕猥以眇躬獲膺大寶顧惟涼薄每懼顛隳旰食宵衣恐一夫之失所臨深履薄憂庶政之未孚雖粗致小康而未臻大

化一昨灾纏沙鹿兵駐銅臺擐甲執兵頗勞師旅飛芻輓  
粟重困生靈賴天地垂休將相叶力克寧邦寓永靜烟塵  
凱歌共樂於班還喜氣實騰於遠邇豈一人之感召蓋羣  
后之扶持弓矢載櫜大慶已流於中外雷雨解作普恩宜  
被於寰區庶使齊人咸霑霈澤可大赦天下應十月二十  
五日昧爽已前除犯十惡光火殺人僞行印信官典犯賊  
合造毒藥屠牛鑄錢外其餘罪無輕重已結正未結正已  
發覺未發覺咸赦除之侵官濫已爾其有誅督責暴征我  
所不忍應係欠省司課利場院官等宜依近行宣命期限

磨勘徵督內有送納所欠錢物得足者其違限愆罪特放  
如有沒納本人及保人家業盡抵外尚欠錢物更無抵當  
者其所欠並與蠲放其逐人罪犯特從減等其去年降宣  
命月日後來欠負者不在此限昨以水旱爲沴什一未均  
冀便蒸黎因令檢覆未明公法或彰隱漏之愆爰念小民  
宜示矜寬之典近令檢田有隱漏合當罪犯者並放所有  
合罰令倍納租稅者特放並令卻依實頃畝輸納貨泉所  
聚徵督必行況係省之逋懸宜應期之供辦但以兵戈之  
後帳籍空存已行蠲放之恩尚憂未普再示優饒之命式

表推恩天福元年應經兵火處州府諸色場院因此失陷  
錢物等先曾指揮蠲放一半者今並全放未曾經減放者  
今與蠲放一半天災或降地分所招攜老幼以流離棄田  
園而蕪沒深懷惻憫宜示招安蒲同晉絳滑濮魏府鎮定  
等州人戶或經亢旱或屬兵戈逃移人戶等應移戶所欠  
今年已前諸雜稅物並特除放宜令州縣曉示招攜如有  
復業者仍放一年秋夏租稅二年諸雜差徭緩自攻圍每  
多徭役或因兵死尚有戶存言念傷痍屢宜優恤應差赴  
魏府城下人夫內有中傷身死者除已支贈外特放戶下

三年諸雜差徭勤官奉國旣彰盡瘁之誠賞善酬勞爰舉必行之命應魏府側近州或曾祇應供饋或曾部領人夫當職員寮及州縣官等宜令逐處速具名銜分析申奏當與加恩區宇之表咸在照臨疆場之間寧容隔限示王者之無外期國家之大同應淮南西川兩處邊界自今後不得阻滯商旅明堂欲構必自羣才大道曲全俱無棄物將期多士詎可遺賢累朝廢棄官員與量才敘用頃者借率猶有逋懸方務優饒豈宜徵督先率借洛京舍錢其所欠並放七萃師徒五營吏士偶因罪負遂至逋逃念曾效於

忠勤宜顯行於招誘自用軍已來應有諸軍及諸色負罪  
逃背諸處人等限一百日內許所在陳首並不問罪卻與  
放管如限內不出復罪如舊諸州府應有見禁此色人家  
口骨肉並從釋放恩隆加等固有明文道在恤孤宜宏異  
渥自去年出師來諸軍將校有沒於王事者子孫並與量  
才敘錄臯陶五刑旣從流放商王一德用解網羅想其憊  
悴之容爰示哀矜之道應貶降官與量移已量移者與復  
資流配人等並放還仁及枯骨澤渥重泉睠哲后之芳蹤  
乃有國之令典魏府管內用軍已來墳墓所毀無主者委

逐處官吏指揮隨事修整祭奠仍費官中支給賦歛未省  
杼軸猶空言念疲羸聊得蠲貸諸道州府營田戶部院務  
省莊等天福元年秋夏租課錢帛斛斗諸雜物色等除已  
納外應有逋欠並與蠲放於戲萬靈蠢蠢生成咸賴於上  
元六合茫茫舒慘悉由於元首朕每興念慮莫釋焦勞遂  
覃在宥之恩將合好生之德朝野士庶中外臣寮體予蕩  
蕩之懷贊我巍巍之治無怠於協謀勩力共期於偃革修  
文益勵乃誠永禪寡德布告遐邇咸使知聞

遺後蜀後主告即位書



大晉皇帝奉書大蜀皇帝伏自中原多故大憝繼興朱氏  
不道而皇天不親沙陀背義而蒼生失望不期景運猥屬  
眇躬方鼎足以分疆宜鄰好之講睦況有姻親之舊敢交  
玉帛之歡機務方殷保攝是望

答淮東鎮書

昨者灾生安陸釁接漢陽當三伏之炎蒸動兩朝之師旅  
豈期邊帥不稟上謀洎復城池備知本末尋已捨諸俘執  
還彼鄉閭不惟念效命之人兼亦敦善鄰之道今承來旨  
將正朝章希循宥罪之文用廣崇仁之美其杜光鄴等再

令歸復

欽定全唐文

卷一百十七

晉高祖

三十

欽定全唐文卷一百十八目錄

晉少帝一

答靈武節度使馮暉制

親征契丹命將制

賜襄州粟詔

給復襄州詔

親征詔

流楊麟等詔

整飭吏治詔

復置明經童子科詔

修省詔

親征詔

準廣雪冤賞例詔

賜高麗王王武詔

量留晉陽令劉繼儒詔

令長吏掩埋暴骸詔

除授留守宜降麻制勅

禁兩稅加耗勅

修製祭器勅

禁盛夏滯獄勅

疏通吏部注擬勅

貸鄧州節度宋彥筠擅殺勅

勒停李鼎現任勅

贈瞿進宗左武衛上將軍勅

復置翰林學士院勅

令三銓詳看關牒勅

䟽理獄訟瘞埋病亡勅

科陳延福罪勅

流張嗣宗勅

欽定全唐文卷一百十八

晉少帝

帝諱重貴高祖從子唐天祐十一年生爲高祖所愛以爲  
子天福三年授開封尹封鄭王六年授廣晉尹封齊王七  
年六月即位開運三年契丹遷帝於黃龍府降封負義侯  
後徙建州居塞北凡十八年在位五年年五十一

答靈武節度使馮暉制

非制書忽忘實以朔方重地蕃部窺邊非卿雄名何以彈  
壓比欲移卿內地受代亦須奇才

親征契丹命將制

宣王講武逐獫狁於太原漢帝出師走匈奴於瀚海是知  
蠻夷猾夏不能絕之於古今戎狄無厭不能拘之以信義  
先皇帝昔當草昧方在龍潛未登鄙邑之壇始有晉陽之  
難契丹主徑驅蕃部直抵并郊遂解重圍助成大統我之  
興也彼有力焉於是邀之以鬼神申之以盟誓載諸簡冊  
傳厥子孫爾後常念前因每思厚報減宮闈之服玩罄府  
藏之珠珍供億無時道塗相望而契丹貪殘滋甚驕縱異  
常通使命於江淮徵貢輸於郡國包藏既久姦譎漸萌既



而興議誼譁羣情憤激軍民扼腕中外同辭請興貔虎之  
師以遏豺狼之患先皇帝重其信誓篤以初終降萬乘之  
尊禮不義之虜耗中原之力奉無已之求迫於續受丕圖  
虔承顧命每欲息民繼好敢忘屈已從人所以厚禮卑辭  
以隆其意推心置腹以示其誠其如鴆毒潛深獸心難革  
乘我歉歲伐予大喪平視中原竊窺神器朕實不德民罹  
其殃愧悼增深寤寐興嘆向者躬提黃鉞親指靈旗駐於  
甘泉自春徂夏賴祖宗垂慶天地儲休猛將如雲謀臣若  
雨士百其勇人一其心寸鏃不遺狂戎自潰氛霾少息師

旅凱旋今則漸入秋深慮爲邊患朕以志平寇難不敢荒  
寧將期親率全師恭行天討庶幾一舉永靜三邊罔辭櫛  
沐之勞用拯生靈之患得不精求將帥慎東偏裨冀成破  
竹之功以殄折膠之寇爰於剛日乃降命書順國軍節度  
鎮深趙等州觀察處置幽州道行營副招討等使特進檢  
校太師兼中書令行真定尹駙馬都尉杜重威地居戚里  
神授戎韜久服金革之勞累濟艱難之運虎牢晝閑一麾  
而蠹賊自消河朔未寧再駕而氛妖繼息戡定之業溢於  
鼎鐘天平軍節度鄆齊棣等州觀察處置兼管內河隄等

使光祿大夫檢校太尉平章事張從思清明可鑑忠正無  
邪夙懷刺虎之謀早列濯龍之籍當襄陽之役克成監護  
之勲及北虜之來實賴籓籬之固器業之用可謂縱橫西  
京留守起復檢校太尉兼侍中行河南尹景延廣文武全  
才雲龍際會指經綸於掌內藏甲馬於胷中久權七萃之  
師繼委十連之帥軍民畏服畿甸肅清左右之勞書於盟  
府武寧軍節度徐宿等州觀察處置等使開府儀同三司  
檢校太師兼侍中趙在禮河嶽鍾靈松筠植性授玉鈴之  
秘畧得金版之沈機輔翼數朝周旋重鎮述職而必先九

牧事君而唯盡一心尊獎之功光乎史冊建雄軍節度晉  
慈隰等州觀察處置等使特進檢校太師平章事安叔干  
衆推武庫素曉陣圖疾惡如讐見義思勇觴酒豆肉無虧  
撫士之心尺籍伍符盡得總戎之訣軍旅之任實契僉諧  
前泰寧軍節度充沂密等州觀察處置等使特進檢校太  
師平章事安審信久處腹心早攀鱗翼倜儻乃萬夫之長  
驍雄眞六郡之豪燕頷虎頭咸仰將軍之相牙璋犀節累  
持方伯之權英特之名播於中外河中護國軍節度管内  
觀察處置等使開府儀同三司檢校太師平章事安審琦

嚴明無翳寬簡自居善知奇正之謀備熟孤虛之法首赴  
風雲之會昔同帶礪之盟累殿藩垣常堅夾輔連帥之重  
倚若長城河陽三城節度孟懷等州觀察處置管內河隄  
等使青州行營副都部署特進檢校太師符彥卿惟爾先  
臣實爲名將世襲弓裘之慶門傳忠孝之規西漢三雄徒  
稱傑出東京七校乃爲時生竭盡之心貫於金石義成軍  
節度滑濮等州觀察處置管內河隄等使北面行營馬步  
都虞候開府儀同三司檢校太師皇甫遇劒敵萬人力摧  
九虎赤羽若日蒲大夫之英風快馬如龍曹景宗之意氣

繼承重寄必竭純誠義烈之稱播於寰海北面行營馬部  
都排陣使兼馬軍都指揮使特進檢校太保右神武統軍  
張彥澤猛若關張氣吞荆蜀荐膺委寄每著勤勞鳴鏑離  
弦旣得吟猿之妙青萍出匣久彰斷兕之名營陣之間皆  
推果毅橫海軍節度滄景德等州觀察處置管內河隄等  
使幽州道行營右廂排陣使特進檢校太師王延裔鬼谷  
傳書神龜授印委鎮臨於滄海賴控扼於邊陲繕甲治兵  
暗蓄摧凶之計深溝高壘不移持重之心捍禦之謀斷於  
胃臆保義軍節度陝虢等州觀察處置等使特進檢校太

尉宋彥筠威惠兼著膽氣無儔累佐戎權善貞師律千軍  
萬馬憚陳慶之雄名三令五申得孫武之戰術將帥之選  
皆謂當仁前懷德軍節度管內觀察處置等使光祿大夫  
檢校太傅田武早從戎伍備歷艱難安邊展頗牧之才制  
勝合韓吳之法向者仗其舊德委以邊藩頗資外禦之功  
實有分憂之績忠貞之節雅叶東求北面行營步軍都排  
陣使兼步軍都指揮使特進檢校太保左神武統軍潘環  
幕府書勲師干著效攻城野戰獨麾鄭國之旗陷陣先登  
幾獲魚門之胄洎分環衛彌見公忠兵革之時所宜登用

而皆位崇侯伯任重土茅俱爲社稷之臣悉是棟梁之具  
或推忠徇義或報國忘家常堅翼戴之心夙蘊澄清之志  
朕所以告於宗廟質以蓍龜授之以征輶付之以蕭鈇但  
以狂戎侵掠生聚虔劉旣貽中國之羞抑亦人臣之恥爾  
等上則承先皇顧託輔予沖人次則副朝廷倚毘委之重  
任所宜同德比義勩力齊心各竭乃誠共安國步功業可  
以不朽富貴可以無窮況今芻粟俱充士卒咸憤旌旗萬  
隊甲馬千羣呼吸則山嶽蕩搖號令則乾坤震動以此制  
敵何敵不摧以此攻城何城不克竚期獻俘清廟懸首素



旗同集大功永清四海於戲周王任吉甫南仲乃懼戎夷  
漢帝任去病衛青遂空沙漠今吾命帥皆謂得人勉立異  
勲速平多難無令數子獨擅前功凡我股肱當體朕意杜  
重威充都招討使張從恩充兵馬都監景延廣充馬步軍  
都排陣使趙在禮充馬步軍都虞候安叔干充馬步軍左  
排陣使安審信充馬步軍右排陣使安審琦充馬步軍都  
指揮使符彥卿充馬軍左都指揮使皇甫遇充馬軍右都  
指揮使張彥澤充馬軍排陣使王延裔充步軍左都指揮  
使宋彥筠充步軍右都指揮使田武充步軍左廂排陣使

潘環充步軍右廂排陣使

賜襄州粟詔

襄州城內百姓等久經圍閉例各饑貧宜示頒宣用明恩  
渥大戶各賜粟二石小戶各賜粟一石宜令襄州以見在  
數充

給復襄州詔

叛逆之臣必行於討伐凋傷之俗宜示於撫綏一昨逆賊  
安從進不戒滿盈輒謀違背占據城壘虐害人民元凶已  
就於嚴誅比屋宜加於霑澤俾令蘇息用示軫傷應在城

人戶除已行賑貸外特放今年秋來年夏城內物業上租  
稅其城外下營寨處或有砍伐却桑柘及毀拆却屋舍處  
特與除放今年來年二月合係租稅其管內諸縣人戶等  
被安從進數年誅剝多是貧寒應天福七年夏稅已前諸  
色殘欠及沿徵錢物并公私債負等並與放除

親征詔

朕以恭承先旨尊奉北朝無事不隨有求皆應竭國家之  
財用務蕃漢之歡和豈謂貪殘終隳信義直驅戎虜深犯  
封疆如是憑陵安能俯就顧師徒之憤惋念生聚之凋傷

頃議親征用平醜類蓋救驚騷之患寧辭跋涉之勞取此  
月十三日躬御六師北征雜虜指期旦夕悉盪氛霾凡爾  
百寮當體朕意

流楊麟等詔

楊光遠隨幕賓從等久在樽罍比資參佐當光遠始謀逆  
節未嘗聞拯救之言及楊承勲決意歸明又不是贊成之  
數但思朋附悉合誅夷尚示寬恩俾從遠竄麟流威州節  
度掌書紀任邈流原州觀察支使徐晏流武州縱逢恩赦  
不在放還之限

整飭吏治詔

向者朝廷無事經費尚多今則師旅方興支贍尤廣必資國力以濟軍須近以四海災傷頻年饑饉賦租減少筦榷虧懸帑藏不充公私重困今歲三時不害百穀用成所在流民漸聞歸業商旅之人稍衆山澤之利咸通郡邑徵科自然容易務場課額必有增盈較量之間斷可知矣牧宰之任選擢非輕至於阜俗康民豐財益國乃爲本職固合用心苟能一一躬親孜孜臨莅必絕滯凝之事兼除僥倖之門副我憂勤顯爾政績將求課最須設科條況藩侯郡

守等皆是良臣各膺重委盡傾誠款以奉國朝式當倚注之時宜示勸懲之道應天下諸州各以係省錢穀秋夏徵科爲帳籍一季一奏一年賦稅及限更委在任一年次年又不稽逋聽三周年爲滿三年皆得辦事即與別議陟遷如或纔到任所課績不前亦當即時罷替其間災沴之地須明具敷陳審其虛眞別有處分於戲朕纘承大業于茲三年虔奉丕基不敢失墜兢兢業業若履春冰小信未孚咎徵斯降旱蝗相繼連歲爲災兵革未寧四方多事下慚黔首仰愧蒼穹所賴將相公卿元戎郡守或先朝宿舊或

當代英賢送往事居始終如一分憂共治誠節彌堅倚賴  
既深傾輸亦至必能爲國盡忠臨事公勤不更假於指蹤  
固自知其陳力凡百有位宜體朕懷

復置明經童子科詔

明經童子之科前代所設蓋期取士良謂通規爰自近年  
暫從停廢損益之機未見牢籠之義全虧將闡斯文宜依  
舊貫庶臻至理用廣旁求其明經童子二科今後復置

修省詔

朕虔承顧命獲嗣丕基常懼顛危不克負荷宵分日昃罔

敢怠荒夕惕晨興每懷祗畏但以恩信未著德教未敷理道不明咎徵斯至向者頻年災沴稼穡不登萬姓饑荒道殣相望上天垂譴涼德所招仍屬干戈尚興邊陲多事倉廩不足則輟人之餽食帑庫不足則率人之資財兵士不足則取人之中丁戰騎不足則假人之乘馬雖事不獲已而理將若何訪聞差去使臣殊乖體認不能敦於勉諭而乃臨以威刑自有所聞益深愧悼旋屬守臣叛命戎虜犯邊致使甲兵不暇休息軍旅有戰征之苦人民有飛輓之勞疲瘵未蘇科徭尚急言念於此寢食何安得不省過興



懷側身罪已載深減損思召和平所宜去無用之資罷不急之務棄華取實惜費省功一則符先帝恭儉之規一則慕前王樸素之德向者造作軍器破用稍多但取堅剛不須華靡今後作坊製造器械不得更用金銀裝飾比於遊畋素非所好凡諸服御尤欲去奢應天下州府不得以珍寶玩好及鷹犬爲貢在昔聖帝明君無非惡衣菲食況予薄德所合恭行今後大官常膳減去多品衣服帷帳務去華飾在禦寒溫而已峻宇雕牆昔人攸誠玉杯象箸前代所非今後凡有營繕之處丹堊雕鏤不得過度宮闈之內

有非理費用一切禁止於戲繼聖承祧握樞臨極昧於至道若履春冰屬以天災流行國步多梗因時致懼引咎推誠期於將來庶幾有補更賴王公將相貴戚豪宗各啟乃心率繇茲道共臻富庶以致康寧凡百臣寮宜體朕意

親征詔

朕以蕃寇未平邊陲多事選求將帥徵發師徒北面屯軍汾河守禦即日雖無侵軼亦須廣設隄防朕將親率虎貔躬擐甲冑俟聞南牧即便北征不須先定日辰別有曉諭所有供億支用宜令三司預自指揮令隨從諸司職員並

宜照常備行諸侯不得朝覲亦不得以進獻供待借欵吏民凡百臣寮當體是意

準廣雪冤賞例詔

理冤申屈勞績可嘉內職外官課最無異苟能雪活何忤甄酬宜先錄公文直具奏聞或實官滿到闕投狀無致隔年底絕濫訛用分真僞宜依

賜高麗王王武詔

卿才略耀奇規模冠俗苟息之忠貞自許翁歸之文武兼全鷹瞵鸞立之姿折衝萬里夏屋春臺之煦化洽一隅而

又尊獎誠深貢輸禮備是於剛日乃降明恩宜旌命世之英俾峻真王之秩爰旌亮節仍進崇階可檢校太保持節元薨州都督上柱國充大義軍使仍封高麗國王今命使光祿卿范匡政使副太子洗馬張季凝等往彼宣賜官告勅牒國信物等具如別錄勅賜高麗國王竹冊法物等竹冊一副八十簡紫絲條聯紅錦裝背冊匣一具黑漆銀合陵金銅鑲鑰二副攀環紅錦托裏襯冊文兩幅黃綾夾帕一條蓋冊匣三副黃綾夾帕一條蓋冊匣三副黃絹油夾帕一條舉冊匣熟紫絲板二條絡冊牀熟紫絲油畫檐牀

一張銀裏脚角竿頭金柏木冊案一面紫綾案褥一領夾裙襪全行事紫綾席褥一副襯冊牀紫綾一副

量留晉陽令劉繼儒詔

興王舊地原廟所存載懷瞻奉之心允屬循良之吏以爾莅官有政晉人美之假其省銜許留周歲更圖盡瘁以稱陟明可檢校工部員外郎仍量留一年

令長吏掩埋暴骸詔

自冬徂春少憊雨雪掩骼埋胔必契陰靈將召純和宜藏暴露宜令所在長吏依此掩藏仍付所司

除授留守宜降麻制勅

留守之任委寄非輕凡降絲綸宜同將相起今後除授留守宜降麻制仍付所司

禁兩稅加耗勅

朕自居藩邸每務躬親稟先帝之聖謨見萬方之庶政洎登宸極思致時康屬蝗旱爲災耕桑失業顧惟寡昧深軫焦勞舉一食思稼穡之艱難行一事期黎民之蘇息爲先清朝名士朱邸舊寮深窮蠹政之源備得養民之本況藩侯郡牧察俗觀風必能副沖人委仗之心駐疲俗逋逃之

足明行條制俾絕侵漁使稅額無虧戶口獲濟斯爲急務  
要在頒行便可散下諸州嚴誠主者盡令遵守無致因循  
徧緊惠養之功共致昇平之運仍付所司

### 修製祭器勅

天地宗廟社稷及諸祠祭等訪聞所司承管多不精潔宜  
令三司預支一年禮料物色於太廟置庫收貯差宗正丞  
主掌委監察御史監當祭器祭服等未備者修製

### 禁盛夏滯獄勅

朕自臨寰宇思致和平以四海爲家慮一物失所每念徃

牢之內或多枉撓之人屬此炎蒸倍加軫憫冀絕滯淹之嘆用資欽恤之仁應三京鄴都及諸道州府見禁罪人等宜令逐處長吏嚴切指揮本推司及委本所判官疾速結絕斷遣不得淹延及致冤濫仍付所司

疏通吏部注擬勅

吏部已判成選人等訪聞人數絕多闕員甚少頗爲淹注例是饑貧宜推振滯之恩用廣進身之路諸州府判掾見有員闕不少其見在黃衣選人等宜令注授前件官除三京鄴都掾曹外其餘並許注擬候秩滿無遺闕者五選六



選減一選七選八選減兩選九選十選減三選內有超資者再入官日即依本資敘理河東管內及鄜延涇邠秦隴鳳等州管內闕員不少選人以家私不便多不服官宜令所司不拘超折注擬仍俟秩滿無遺闕者五選六選減三選七選八選減四選再入官日却依本資敘理所注前項州縣官等宜令銓司依判成次第注擬切在公當不得阿私仍不許選人通關仍付所司

貸鄧州節度宋彥筠擅殺勅

王者約法之義比在防非將致一平所期共守昨以憲司

舉職有國舊規宋彥筠尋悔愆尤理可矜恕念茲勲績深軫朕懷特開宥過之恩庶叶匿瑕之道凡百有位宜勵乃誠所犯科條並釋放

勒停李鼎現任勅

李鼎方居憲府合稟朝章豈可八月中喪妻十月後供狀欺公冒寵以死爲生旣彰罔上之愆難處觸邪之地止停見任尚示寬恩宜勒停見任

贈翟進宗左武衛上將軍勅

故淄州刺史翟進宗不穀不德營兵叛予陷爾厲階力屈

遇害念茲忠瘁實用盡傷蜀主恕其黃權魯莊誅其卜國  
皆非罪也吾將贈之用慰貞魂宜頒漏澤可贈左武衛上  
將軍

復置翰林學士院勅

翰林學士與中書舍人分爲兩制各置六員偶自近年權  
停內署況司詔命必在深嚴將使從宜却仍舊貫宜復置  
翰林學士院

令三銓詳看關牒勅

銓總之司提舉是務時臨注擬尤在精詳宜令三銓子細

金定全月文 卷一百一  
看驗關牒或稍涉差謬即據理科條將澄刈楚之風用誠  
侮文之吏

疏理獄訟瘞埋病亡勅

淹延刑獄實啟倖門稽滯瘞埋尤傷和氣追呼既廣勞擾  
斯煩檢驗取裁停駐爲弊宜令凡有禁繫不得分外追人  
百姓死亡亦仰及時葬送既無重擾式叶化風仍付所司  
科陳延福罪勅

陳延福位居牧守首被訟論移市肆以創迴圖已彰生事  
假役夫而科採捕尤驗擾人但以稱贍本州云承累政雖

除姦革弊全昧經心而案罪計贓未明入已聊從懲罰用  
顯含洪宜罰征馬十匹放

流張嗣宗勅

張嗣宗已招過犯斷處徒刑雖定徵銅更難居任旣聞除  
替便合稟承乃敢拒違益彰狡惡須加竄謫俾省憊尤宜  
配流商州